

CUSSEGL GROND

Sessiun da favrer 2023

Dumonda Spagnolatti concernent in concept general per sanar la via da la Val Calanca

Sin il territori da la vischnanca da Castaneda è vegnida giu ils 4 da december da l'onn passà l'ultima bova d'ina entira retscha da bovas sin la via chantunala. Pervia da la bova è la part da la val tranter Buseno e Rossa stada isolada durant plirs dis. Plinavant ha la crudada d'enormas massas da material destruì ils vials da la via chantunala.

Actualmain po il traffic circular mo sin in vial e proximamain èsi previs da cumenzar cun las lavurs da reparaziun e da sanaziun. Deplorablamain n'è questa bova betg in cas singul. En il medem lieu sco er sin ulteriurs trajects da la via èn gia pli baud vegnids giu plirs sbuvaditschs.

Nus menziunain qua ils eveniments ils pli gronds: Val del Infern, territori Pont dal Ram, territori chavas da crappa dad Arvigo, territori spartavias a Buseno.

Sco ch'ins po leger en las statisticas, na vegn la midada dal clima dals ultims onns betg ad esser in grond agid per il futur e deplorablamain stuain nus esser conscients, che tals eveniments vegnan a capitar adina pli savens.

Fin ussa n'hai per fortuna dà naginas victimas, ma nus na pudain betg adina provocar il destin. Perquai stuain nus chattar ina soluziun per pudair garantir en emprima lingia la segirezza sin l'entira via da la Val Calanca.

Ins senta la tema da la gliueda da charrar sin questa via, cunzunt da malaura. Perquai èsi impurtant da garantir la segirezza là, nua che quai è pussaivel.

La segirezza è in element central per la decisiun d'ina famiglia da sa domiciliar en la val.

Ils ultims onns ha il chantun investì blers daners en la via da la Val Calanca e per quai essan nus engraziaivels. Ma ussa na sa tracti betg da sanar u da reparar ina via, mabain igl è indispensabel da segirar l'entira via da la Val Calanca.

Sin fundament da questas explicaziuns tschentain nus las suandantas dumondas a la Regenza:

1. Ha la Regenza enconuschientscha dal privel real ch'exista sin la via da la Val Calanca?
2. Sche gea, ha la Regenza prendi en consideraziun da far in concept general d'intervenziun per tut la via da la val; in concept che ha la finamira da garantir uschè baud sco pussaivel dapli segirezza per tut ils utilisaders da la via?
3. Ha la Regenza l'intenziun d'examinar la pussaivladad da construir ina u pliras gallarias sin ils trajects da via spezialmain privlus?

Cuira, ils 15 da favrer 2023

Spagnolatti, Atanes, Censi, Bachmann, Bardill, Bergamin, Berther, Berweger, Biert, Binkert, Bischof, Bisculm Jörg, Cortesi, Crameri, Degiacomi, Della Cà, Derungs, Dietrich, Epp, Feuerstein, Föhn, Furger, Gansner, Gartmann-Albin, Hoch, Hofmann, Jochum, Kohler, Kreiliger, Lamprecht, Loepfe, Luzio, Maissen, Mani, Menghini-Inauen, Messmer-Blumer, Michael (Donat), Michael (Castasegna), Nicolay, Oesch, Pajic, Preisig, Righetti, Rusch Nigg, Rutishauser, Saratz Cazin, Sax, Schneider, Schutz, Tanner, Ulber, Wieland, Zanetti (Sent)